

Adam Taylor- Janvyi 2026

Bouônjour, bouonne gens. Ch'est mé Adam, auve ma preunmié lettre Jèrriaise aniet lé dgix d'Janvyi 2026.

Jé d'meuthe en Australie et ma maïson est à Newcastle à quâsiment chent milles dé Sydney. Newcastle est la deuxième pus grand' ville d'la Nouvelle-Galles du Sud et y' a un tas d' belles grèves à sablion ilà. Étout, y' a eune grande caûchie, l'unnivèrsité et un hôpita. Nou peut trouver aussîn des mangnifiques gardîns d'vîngnes et des pars nationaux ou 'bushland' en Angliais Australien. Lé mais d' Dèzembre est l' pus caud et i' faithait presque 34 degrés lé jour dé Noué.

J'soulais être un soudard musicien dans l'armée Australienne mais achteu j'travâle comme un maît' dé l'Angliais à l'Unnivèrsité dé Canberra. Quand j'tais dans l'armée j'avais d'la chance et j'viageais à l'entou du monde et j'pouvais jouer pour bein des cérémonies. Ieune dé ches cérémonies prînt pliaiche en Turtchie pour lé jour d' ANZAC, lé vîngt-chîng d'Avri – un jour tch'est hardi împortant pour touos l's Australiens et les Kiwis.

J'sis Australien mais la fanmil'ye à ma grand'méthe 'tait d'Jèrri. San nom d'janne fil'ye 'tait L'Arbalêchi. Quand j'tais mousse j'm'èrsouveins d' mé d'mander dé ioù qu'i' 'tait chu nom-là? Ma grand'méthe mé dit qué chu nom avait s'n origine en Jèrri et qué san grand-péthe soulait pâler raik'lé Français dans sa maïson quand ou 'tait eune p'tite mousse. Mais achteu j'crai qu'i' pâlait en Jèrriais. J'crai qu'i' tchittit l'île duthant lé dgiêx-neuvième siécl'ye.

Ph'lip L'Arbalêchi, m'n anchêtre, 'tait un parfummyi, en Ville, i' vendait des parfums, et san bisnesse 'tait célèbre pour "the Original Jersey Eau de Cologne" tchi fournissait à la Reine Victoria. Lé bâtisse dé sa parfumn'thie est acouo là, Number 2 Charing Cross, où'est qu'i' y' a la statue du Crapaud. Ma bouonnefemme halit un portrait d'mé d'but à côté du bâtisse tandi qué j'têmes en Jèrri. La chose întéressante est qu'est l'bâtisse d'aniet èrsembl'ye comme lé chein sus l' photographe qué j'vis sus l'lthangie, du dgiêx-neuvième siécl'ye.

Ph'lip, eune fais qu'i' 'tait en Australie, travaillit comme un officyi d'Police pour lé Gouvèrnement d'la Nouvelle-Galles du Sud et auprès ch'nna j'pense qué li et ses fils d'vîntent des cordonniers, mais jé n'sis pon ceux.

À cause dé man întéthêt dans toutes les histouaithes j'décidis à apprendre lé Jèrriais et y'a trais ans qu' jé c'menchis à l'apprendre auve Aline et j'aime bein chute vielle langue ou vièr lîngo comme dit Georges La Forge.

Viyant qué j'aime apprendre lé Jèrriais et l'histouaithe dé Jèrri j'décidis à visiter l'île auve ma bouonnefemme, Erica. J'trouvis qu' la Hougue Bie 'tait hardi mangnifique et eunique. J'fus diversément ravi par lé Trésor du Câtillon et l' café du mûsée d'la Hougue Bie avait des gâches tch'avaient hardi un goût d'èrvas-y!

Ch'tait mangnifique dé vaie la campagne en Jèrri et, ma bouonnefemme et mé, j'aimîmes rester à Grève dé Lé à l'Hôtel Prînce dé Galles.

J'pus trouver la taque d'eune peintuthe tch'est pendue dans l'parleux siez mé. Ch'est un p'tit portrait qué j'trouvis sus l'lthangnie et qu'i' fut peint par Thomas Charles L'Arbalêchi. Lé portrait avait ieu eune duthe vie et i' 'tait endommagi quand il arrivit siez mé en Australie. La taque sus l'portrait est un clios à St Ouën. Nou peut vaie des vaques dans l'mitan d'un bieu clios auve la mé au liain. Achteu siez nous quand j'l'èrgarde, j'peux m' ramémouaither ch't heûtheux viage en Jèrri et j'espéthe que j'pouôrrêmes èrtouônnner en Jèrri bétôt à l'avnîn.

Mèrcie bein des fais pour m'aver écouté à matîn. À bi.